



Insome cumò us conti la storie dai Tartars. A jerin doi fradis che a vivevin tal gno paîs fasint i faris e lavorant un pocje di tiere. A levin vie gubits; a aravin ancjemò cul cjaval, a tignivin dut mâl te lôr cjase. Un si vistive simpri cuntune mimetiche di paracadutist e chel altri simpri di blu, come i operaris di Mao; se al ploveve i bastave taiâ un sac di farine pal lât lunc e fâsi cussì un bon capucjo.

Alore jo ur fasevi cualchi scherç: une dì, jo che o vevi buteghe di alimentârs, o vevi radunât un dîs-cuindis gjats dai lôr dongje de farie che e cunfinave cu la mê buteghe e che e veve une barconete cence veri. Alor ai gjats ur davi ratais e lôr si passevin: chel cence un voli, chel cence une orele, il gjat ciçon de Comari... ducj li po...

Alore ur buti un petart e chei no ti scjampino un daûr di chel altri pe barconete? Zann zann zann

I fradis Tartars a molin martiel e incuin e a tachin a porconâ... jo o ridevi come un mat...

Une altre volte o fasevi cuei sbrudiot pal cjan te rimesse che e cunfine cul lôr ledanâr; o vevi un di chei fornei cu la bombule.

Di là dal barcon de rimesse Rico Tartar mi fâs: “Ce profum, Milio, ce preparistu di bon?”

E jo i disei che o vevi i moredôrs in cjase e che o preparavi par lôr.

Alore Rico Tartar al ûl di cerce. I passi un cop di sbrudiot par cjan e lui: “Ustiment! Buine cheste mignestre... isal ancje ardiel? Tegnimi in bande un plat... ti pai...”

O soi tornât chê altre dì di chês bandis; cumò o soi in pension e la buteghe e je stade vendude dal paron: jo o jeri dome in afit. I doi Tartars fratant a son muarts, puarets. A jerin plens di bêçs fasint la vite dai miserabii... tropis voltis no levino in bancje cu la damigjane

plene di banconotis? La lôr cjase e je biele e ordenade, cumò. E je a stâ int foreste... a àn cambiât dut, barcons, quartis, piturât ben dut.

Dome doi particolârs mi ricuardin il passât: la insegne CAMPARI e la targhe MANISCALCO cul fier di cjaual: a son su la parêt di misdî de farie, sfantadis. No coventarès zontâ che la farie e je stade trasformade intune sorte di rimesse di chei foescj che a son cumò a stâ.

***di Milio dai cjans***